

INUIT ATAQATIGIIT INATSISARTUNI



UPA 2024/56

08.05.24

Edvard Nielsen Aronsen

Filmiliornermi aningaasartuutit utertinneqartarnerat pillugu Inatsisartut inatsisissaattut siunnersuummik saqqummiussinissamik Naalakkerusisut peqquneqarnissaat pillugu Inatsisartunut aalajangiiffigisassatut siunnersuut. Inatsimmi nunatsinni filmiliornermi aningaasartuutit 25 %-iilik utertitsinissaanissaq pisinnaanngortissavaa, maannalu aningaasanut inatsimmi oqaasertaliussa qaqutigalugu maleruagassiorneq taarsissallugu.

(Inatsisartunut ilaasortaq Peter Olsen, Inuit Ataqatigiit)

Oqaaseqaat:

Peter Olsenip Inuit Ataqatigiit tunuliaqutaralugit aalajangiiffigisassatut siunnersuutaanut imatut oqaaseqassaagut.

Siunnersuutit siunertaraa filmiliorfissuit nunatta avataaneersut Nunatsini filmiliornissamut soqutiginninnerulernissaat. Tamannalu ilaatigut filmiliorfissuit nunatsinni filimionermi aningaasartuutimik ilaat pisortanit matussuserneqarnissaanut qinnuteqarsinnaalersinnerisigut pisinnaasoq Inuit Ataqatigiinniit isumaqarpugut.

Filmiliorfissuilli nunatsini filimiliorartormikkut arlalippassuartigut iluaqusiisinnaasut isumaqarpugut. Aningaasarsiorneq, anersaakkut immersorneqarnikkut, filmiliorfik isiginnaartitsisartunilu ineriartortitsinikkut allarpassuartigullu iluaqutissartaqartoq isumaqarpugut.

Filmiliorfissuit nunatsinni filimiliorartorlutik tikikkunik nunatsinni filmiliorfik, isiginnaartitsinerup silarsuaani suliaqartut allalu suleqatigisassagaat takorloorparput. Tamanna nunatsinni filmiliornermik suliaqartunut ineriartuutaallunilu aningaasarsiorfiusinnaanera isumalluarnartoqartipparput.

Filmiliorfissuit nunatsinni filmiliornissamik soqutiginnippit; tamanna aamma siunnersuuteqartup itisilerlugu tunngavilersuutimini eqqaavaa. Ajoraluartumillu filmiliorfissuit nunatsinni pisusaartitsillutik pisimasulikkersaarlutilluunniit filmiliorfik angamik nunani allani immiussinissartik toqqartarpat. Tamanna allanngueqataaffigisariaqarparput.

Tassami filmiliorfissuit nunatsinni filmiliorfik angamik filmiliornerup isiginnaartitsinerullu silarsuaani suliaqartunuinnaq iluaqutaanaviangitsoq isumaqarpugut.

Tassami filmiliorfissuit filmiliorfik angamik aningaasarpassuarnik atuisartut ilisimavagut. Aningaasartuutaat tassaaginnarneq ajorput filmiliorfik aammalu filmiliorfik. Filminik angisuunik suliaqarnermi inuppassuit suleqataasarput, taakku aamma najugaqartinneqartarput, nerisaqartarput, angallanneqartarput allarpassuartigullu sullinneqartarlutik. Suliassat taakku nunatsinni namminersortortatsinnik ilaatigut kivinneqarsinnaasarumaartut takorloorneqarsinnaavoq.

Filmilorfissuit nunatsinni filmiornermikkuq nunarput, pinngortitarsuarput minnerunngitsumillu inoqarfigut nunarsuup sinneranut nittarsaalluarsinnaagaat qularnangilaq. Taamaammat filmilorfissuit nunatsinni filmiornissamat soqutiginninnerulersissallugit suliaqarnissatsinnut tunngavissaqarluartugut Inuit Ataqatigiinniit isumaqarpugut.

Taamaammat Filmilorneq pillugu Inatsisartut inatsisissaattut siunnersuummut Filmiornermi aningaasartuutit utertinneqartarnerannik aqqissuussinerup ilanngunneqarnissaanik Naalakkersuisut peqquneqarnissaat pillugu Inatsisartunut aalajangiiffigisassatut Naalakkersuisut allannguutissatut siunnersuuteqarat Inuit Ataqatigiinniit taperserparput.

Taamak oqaaseqarluta suliap naammassineqarnissaanut qilanaarluta malinnaassaagut.

Edvard Nielsen Aronsen
Inuit Ataqatigiit.